

**Discours de Monsieur le Président de la Chambre des Députés à l'occasion
de la visite officielle de Monsieur Ruslan STEFANCHUK, Président de la
Verkhovna Rada**

(Luxembourg, le 17 juin 2025)

Dir Dammen an Dir Hären,

Et ass mir eng immens Éier, haut den Här Ruslan Stefantschuk, President vun der ukrainescher Verkhovna Rada, an der Chamber begrüessen ze dierfen.

Här President, léiwe Ruslan,

Är Präsenz an eiser Plenière ass en aussergewöhnlecht Evenement mat enger grousser Bedeitung. Mir hunn heibannen am Laf vun de Jore wuel Presidente vun auslännesche Parlamenter do uewen op der Tribün empfaangen, mee et ass déi éischte Kéier, dass d'Chamber speziell fir en nationale Parlamentspresident; e Parlamentspresident, deem säi Land am Krich ass, eng Plenarsëtzung aberuff huet.

Mat der Seance vun haut setzt d'Chamber e kloert Zeechen – en Zeeche vu Solidaritéit, Zesammenhalt a Resilienz.

Wann ech lech, Här President, gläich d'Riednerpult iwwerloossen, fir dass Dir lech un d'Lëtzebuerger Parlament an och eis Bierger dobausse kënn adresséieren, dann ass dat, well d'Zukunft vun der Ukrain och en Deel Zukunft vu Lëtzebuerg ass. Den Ugrëff op d'Ukrain ass en Ugrëff op eis all, eis gemeinsam Wäerter, eis Fräiheeten an eis Grondrechter.

Eis Länner deelen déi selwecht Usiichten, sti fir déi selwecht Fräiheeten an a liewen déi selwecht Iwwerzeegungen. Et ass elo dräi Joer hier, dass Russland Äert Land ongerechtfäerdigterweis attackéiert huet; dräi Joer, zanter dass d'Ukrainer eis all Dag op en Neits hire Courage, hir Kraaft an hir Ausdauer beweisen. Net just fir hiert Land, mee fir eis alleguer.

All puer Woche sidd Dir an engem internationale Kontext ze gesinn, wou mir eis och ëmmer nees begéinen, en Asaz, dee mir an der Chamber besonnesch wäertschätzen. D'Videokonferenz, déi mir hei an der Plenièr mam President Selenskyj haten, mee och den Echange mam Premierminister Schmyhal am méi klengen Format ware wichteg Etappen an der parlamentarescher Zesummenaarbecht tëscht eise Länner.

An ech muss zouginn: Et ass immens bewonnerenswäert, dass e Parlament tëscht Explosiounen, permanenten Ugrëffer an alldieglechem Verloscht weiderhi ka funktionéieren.

An engem Zäitalter, an deem d'Demokratie ëmmer méi hannerfrot a vulnerabel gëtt, schenkt d'Verkhovna Rada eis Hoffnung. An Zäite vu grousssem Leed a Misär hutt Dir, Här President, an Är Aarbechtskolleegen, et fäerdegbruecht, aus Ärem nationale Parlament e Symbol vun Hoffnung, Resilienz a Liewenswëllen ze maachen.

Dofir wëll echlech vu ganzem Häerze Merci soen a felicitéieren.

Et ass och gréisstendeels Äre Verdéngscht, dass mir als Chamber ëmmer zäitno déi neist Entwécklung vum Krich matkréien. Dëst huert eis et ënner anerem erlaabt, insgesamt siwe Motiounen a Resolutiounen unzehuelen, déi vun enger breeder Majoritéit gedroe goufen a ganz kloer eis absolut Ënnerstëtzung vun der Ukrain däitlech gemaach hunn.

Et ass fir eis ausserdeem als Land eng Prioritéit, eisem Engagement nozekommen, déi militäresch, humanitär a finanziell Hëllef fir d'Ukrain weiderzeféieren an d'Opnam vun ukraineschen Flüchtlingen ze vereinfachen. Eis Chamber ënnerstëtzt d'Lëtzebuurger Regierung an deem Kontext komplett.

Erlaab mir, op deem Punkt och ervirzehiewen, datt de Budget fir d'direkt militäresch Hëllef fir d'Ukrain dëst Joer initial e Betrag vun 80 Milliounen Euro hat, mee op 120 Milliounen gehéicht ginn ass. Et handelt sech ëm dee wichtegste lëtzebuergesche Bäitrag zanter der Invasioun vu Russland an d'Ukrain.

Et ass awer och eis Pflicht, lech um internationalen Niveau weiderhin ze ënnerstëtzen. Mir plädéiere mat Nodrock fir d'Aféierung vun engem Spezialtribunal, fir datt déi

Responsabel vun dëse Krichsverbrieche fir hir Akten zur Rechenschaft gezu ginn. Mir wäerten eis och Enn dëser Woch um parlamentareschen NATO-Sommet zu Bréissel op en Neits fir d'Ukrain asetzen.

Als Grënnungsstaat vun der EU ka Lëtzebuerg och do ganz kloer eng wichteg Ënnerstëtzung fir d'Ukrain leeschten. Als Chamber sti mir lech op alle Fall zur Säit, fir lech beschtméiglech op Äre Bäitritt an d'EU virzebereeden.

Den Ugrëff vu Russland op d'Ukrain vum 24. Februar 2022 huet eng nei Ära agelaut. D'Weltuerdnung, wéi mir se kannt hunn, gëtt et net méi. Et ass dowéinst ëmsou méi wichteg, dass mir eisen internationalen Obligatiounen nokommen.

Här President, Dir Dammen an Dir Hären,

Ech hunn hei ëfters mat ukrainesche Flüchtlingen, déi elo zu Lëtzebuerg liewen, geschwat. Ech hat och d'Geleeënheet, esou wéi 5 aner Kolleege aus dem Parlament, d'Ukrain, op Är Invitatioun hin, ze besichen. Fir ze gesinn, ze spieren, wat d'Ukrainer säit Joren aushale mussen.

Iwwert déi Biller vum Krich, déi mir gesinn, och ze héieren, wéi d'Zivilbevëlkerung, wéi Leit, Mammen, Pappen, Kanner, an de Sog vun der Brutalitéit, vun der Onmënschlechkeet, vun Trauer, eragezu ginn.

Dir hat mech op Butscha invitéiert fir den 3. Gedenkdag vun dem Massaker. Ech hat d'Geleeënheet, Iwwerliewenden nozelauschten a mat hinnen ze schwätzen. Dat, wat si mir erzielt hunn, Här President, vergiessen ech a mengem Liewen ni.

An ech wëll et och net méi vergiessen. Well et méi wéi alles gewisen huet, datt de Kampf fir Fräiheet, Rechtsstaatlechkeet, Demokratie, jo, einfach fir Mënschlechkeet, de fundamentale Sënn ass, firwat mir Politik maachen.

An all deenen dramatesche Geschichten, déi mir erzielt kruten, war d'Conclusioun ëmmer déi selwecht: „Wannechgelift, hëlleft eis, datt dat, wat eis geschitt ass, net vergiess gëtt. Datt ausserhalb vun der Ukrain d'Leit wëssen, wat eis passéiert ass. Datt déi, déi massakréiert an ermort gi sinn, net vergiess ginn.“

Mee bei all deene Begéinunge mat Ukrainer konnt ech och ëmmer feststellen, datt hire Liewensmutt sech net verännert huet. Bei all deene Renconteren war och vill Humor a vill Hoffnung präsent.

Et ass d'Responsabilitéit vun eis alleguer, lech dobäi ze hëllefen, dës net ze verléieren.

Dir hutt eis ganz Ënnerstëtzung, eist Matgefill an eis Solidaritéit. Dëse Krich kascht all Dag Liewen, zerstéiert ëmmer méi e Land a seng Populatioun, déi gären hir Fräiheet zeréckhätt, eng Fräiheet no hire Virstellungen.

Mir wëllen e gerechte Fridden an der Ukrain. Deen ass nëmmen hierzestellen, wann d'Ukrain eng aktiv Roll a Stëmm um Wee dohi kritt.

Här President,

Dir hutt mir – an anere Parlamentspresidenten –, wéi ech am Februar zu Kiew war, en Tricot vun Dynamo Kiew geschenkt, mat allen Ënnerschrëfte vun de Spiller, an dobäi gesot, datt, wann de Fridden erëm zeréck an der Ukrain wier, mir zu Kiew den éischte Match vun Dynamo géingen zesumme kucke goen.

Ech hu Jo gesot a meng gréissten Hoffnung ass, dat Engagement esou schnell wéi méiglech kënnen anzehalen.

An enger fräier a friddlecher Ukrain.

Merci, datt Dir haut hei sidd, an Dir hutt d'Wuert.

Conclusion

Merci, Här President,

Merci, léiwe Ruslan,

Dir hutt an Ärer Ried op eis Devise higewisen: „Mir wëlle bleiwen, wat mir sinn.“

Ech wëll lech haut soen, datt mir och wëllen, datt Dir bleift, wat Dir sidd.

An domat maachen ech elo d'Sitzung vun haut de Mëtten zou.